

Zakon o izmjenama i dopunama Zakona o Centralnoj banci Bosne i Hercegovine

OBJAVLJEN: («Službeni glasnik BiH», 29/02)

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj 1. augusta 2002. godine, i na sjednici Doma naroda, održanoj 5. septembra 2002. godine, usvojila je

ZAKON O IZMJENAMA I DOPUNAMA ZAKONA O CENTRALNOJ BANCII BOSNE I HERCEGOVINE

Član 1.

U Zakonu o Centralnoj banci Bosne i Hercegovine ("Službeni glasnik BiH", broj 1/97), u članu 2. u stavu 3. u tački a. riječi: "po kursu 1 prema 1 u odnosu na njemačku marku" zamjenjuju se riječima: "po kursu određenom u članu 32. ovog zakona".

Član 2.

U članu 10. riječi: "Državnog savjeta" zamjenjuju se riječima: "Ustavnog suda Bosne i Hercegovine".

Član 3.

U članu 20. stav 4. mijenja se i glasi:

"4. Guverner može, uz odobrenje Upravnog vijeća, imenovati zamjenike glavnog kontrolora, kako bi pomogli glavnom kontroloru u obavljanju njegovih dužnosti."

Član 4.

U članu 25. u stavu 1. brišu se riječi: "ekvivalentno iznosu 25 miliona njemačkih maraka".

Član 5.

U članu 29. u stavu 1. u tački a. riječi: "vrijednost aktive padne ispod iznosa aktive", zamjenjuju se riječima: "vrijednost njene aktive padne ispod iznosa njene pasive".

Član 6.

Tekst člana 32. ispod naslova mijenja se i glasi:

"Službeni devizni kurs za valutu Bosne i Hercegovine je jedna konvertibilna marka za 0,511292 eura, odnosno jedan euro iznosi 1,955830 konvertibilnih maraka".

Član 7.

U članu 33. u stavu 1. riječi: "njemačke marke" zamjenjuju se riječju "euro".

Stav 2. člana 33. mijenja se i glasi:

"2. Komercijalne banke i druge ovlaštene finansijske institucije u Bosni i Hercegovini na zahtjev kupuju i prodaju konvertibilnu marku za euro, bez ograničenja i po kursu određenom u članu 32. ovog zakona. Maksimum njihove provizije, taksi i

drugih naplata za ovakve transakcije ne može iznositi više od 1%.”

Član 8.

U članu 35. riječi: “njemačke marke” zamjenjuju se riječju “eura”.

Član 9.

U članu 36. u stavu 1. riječi: “između 10 i 15% “zamjenjuju se riječima: “između 10 i 20%”.

U članu 36. u stavu 5. riječi: “iste sedmice” zamjenjuju se riječima: “istog perioda, odnosno 10 dana”, a rečenica: “Ukoliko se neispunjavanje obaveza produži za još jednu sedmicu Centralna banka će obavijestiti nadležne bankarske institucije kako bi one mogle započeti postupak zatvaranja banke.” zamjenjuje se i glasi: “Ukoliko se neispunjavanje obaveza produži za još jedan period, odnosno 10 dana, Centralna banka će obavijestiti nadležne bankarske institucije kako bi one mogle poduzeti odgovarajuće korake protiv banke.”

Član 10.

U članu 38. stavovi 3., 4., 5. i 6. se brišu.

Član 11.

U članu 74. briše se tačka j.

Član 12.

Iza člana 75. dodaje se novi član 75a, koji glasi:

“Član 75a.

Pravna pitanja nastala zbog uvođenja eura

1. Gdje se u bilo kojem pravnom dokumentu (daljem tekstu: pravni akt), važećem na dan 31. decembra 2001. godine, poziva na jedinicu nacionalne valute koju zamjenjuje euro, ovakvo pozivanje će smatrati kao pozivanje na odnosnu euro jedinicu, u skladu sa zvaničnim kursom za konverziju i u skladu sa pravilima zaokruživanja, uspostavljenim od Vijeća Evropske unije.

2. Pravna pitanja koja proizlaze iz zamjene nacionalnih valuta eurom, koja se spominju u pravnom aktu, uključujući i pravna pitanja koja podrazumijevaju varijabilnu kamatnu stopu ili indeks na koji se poziva u pravnom aktu, bit će riješeni primjenom zakona zemlje čija se valuta na taj način mijenja.

3. Zamjena nacionalne valute eurom neće imati efekat poništavanja ili oslobađanja obaveze po bilo kojem pravnom aktu, niti će omogućiti bilo kojoj strani da jednostrano mijenja ili raskine takav ugovor.

4. Za potrebe ovog člana, pravni akt znači bilo koju zakonodavnu ili statutarnu odredbu, administrativni akt, sudsku odluku, ugovor, jednostrani pravni akt, instrument plaćanja osim novčanica i kovanica i bilo koji drugi instrument sa zakonskom snagom.”

Član 13.

Ovaj zakon stupa na snagu osmog dana od dana objavljivanja u “Službenom

glasniku BiH”.

PS BiH broj 80/02

5. septembra 2002. godine

Sarajevo

Napomena: Ovaj zakon je objavljen u “Službenom glasniku BiH”, broj 29/02, a stupio je na snagu 20.10.2002. godine